










colorchecker CLASSIC




x-rite

mm


0 cm 1 2 3 4 5 6 7 8 9 10 11 12 13 14 15 16 17 18 19 20

STAVROPOLOSKAYA SEMENOVSKAYA (1891) (1869)









Ms. 10,052.

Catalogue Moreau  
N<sup>o</sup> 476.

3000

4

I  
A D V I S

A NOSSEIGNEURS DE PARLEMENT,

*Sur la vente de la Bibliotheque de M<sup>r</sup> le Card. Mazarin.*

**M**ESSEIGNEURS, tous les Arrests de vostre celebre Compagnie estans comme des coups de foudre qui écrasent ceux qu'ils frappent, & rendent muets, ou estonnez au dernier point ceux qui les voyent tomber: le vous diray avec tous les respects & soumissions possibles, que celui que vous fulminâtes le 29. Decembre contre la Bibliotheque de M<sup>r</sup> l'Eminentiss. C. Mazarin, mon Maistre, a produit ces deux effets avec tant de Force & de violence, que pour ce qui est de ladite Bibliotheque, il n'y a nulle apparence qu'elle se puisse iamais releuer des pertes qu'elle a desia souffertes, ny mesme éviter celle dont elle est encore menassée, si ce n'est par vn effet tres-remarquable de vostre bonté & protection singuliere: Et pour moy qui la cherissois comme l'œuvre de mes mains, & le miracle de ma vie; ie vous aduoüe ingenuëment que depuis ce coup de foudre lancé du ciel de vostre Iustice sur vne piece si rare, si belle & si excellente, & que j'auois par mes veilles & labeurs reduite à vne telle perfection, que l'on ne pouuoit pas moralement en desirer vne plus grande, j'ay esté tellement interdit & si fort estonné, que si la mesme cause qui fit parler autrefois le fils de Croesus, quoy que muet de sa nature, ne me desflloit maintenant la langue, pour ietter ces derniers accens au trespas de cette mienne fille, comme celui-là faisoit au dangereux estat où se trouuoit son pere, ie serois demeuré muet eternellement. Et en effet M<sup>rs</sup>, comme ce bon fils sauua la vie à son pere en le faisant connoistre pour ce qu'il estoit; pourquoy ne puis-ie pas me promettre que vostre bienueillance & vostre iustice ordinaire fauueront la vie à cette fille, ou pour mieux dire à cette fameuse Bibliotheque, quand ie vous auray dit pour vous représenter en peu de mots l'abregé de ses perfections, que c'est la plus belle, & la mieux fournie de routes les Bibliotheques qui ont iamais esté au monde, & qui pourront, si l'affection ne me trompe bien fort, y estre à l'auenir. C'est à dire M<sup>rs</sup>, qu'elle est composée de plus de quarante mille Volumes, recherchez par le soin des Roys, & des Princes de l'Europe, & par tous les Am-

bassadeurs qui sont sortis de France, depuis dix ans, pour aller aux lieux les plus esloignez de ce Royaume: Car de dire que j'ay fait les voyages de Flandre, d'Italie, d'Angleterre & d'Allemagne pour en apporter ce qu'il y auoit de plus beau & de plus rare; c'est si peu de chose en comparaison des soins qu'ont pristant de Testes Couronnées pour fauoriser les loüables desseins de son Eminence, que ie serois coupable d'en auoir seulement la moindre intention. Aussi est-ce, M<sup>rs</sup>, à ces illustres soins, que cette bonne ville de Paris est redevable de deux cens Bibles traduites en toutes sortes de langues; de l'Histoire la plus vniuerselle & la mieux suiuiue qui se soit iamais veüe; de trois mil cinq cens Volumes, qui sont purement & absolument de Mathematique: de toute les vieilles & nouvelles Editions tant des Saints Peres, que de tous les autres Autheurs classiques: d'une Scholastique qui n'a point encore eu sa semblable: des Coustumiers de plus de cent cinquante villes ou prouinces, la pluspart estrangeres: des Synodes de plus de trois cens Eueschez; des Rituels & Offices d'une infinité d'Eglise: des Loix & Fondations de toutes les Religions, Hospitiaux, Communautéz & Confrairies: des regles & secrets pratiques en tous les Arts, tant liberaux que mechaniques: de MSS. en toutes langues & en toutes sciences: Et pour mettre fin à vn discours qui n'en auroit iamais, si ie voulois specifier tous les thresors ramassez dans l'enclos de sept Chambres remplies de bas en haut, & dont la Gallerie de douze thoises n'est comptée que pour vne, C'est, dis-ie à ces illustres Testes que la ville de Paris, mais que ne dis-ie plustost la France, & non seulement la France, mais toute l'Europe, sont redevables d'une Bibliotheque, dans laquelle si les bons desseins de son Emin. luy eussent aussi heureusement reussi qu'il les auoit sagement proiettez; tout le monde auroit maintenant la liberté de voir & de feuilletter avec autant de loisir que de commodité, ce que l'Egypte, la Perse, la Grece, l'Italie & tous les autres Royaumes de l'Europe, nous ont iamais donné de plus singulier & de plus beau. Chose estrange, M<sup>rs</sup>, que les mieux fournis Iuriconsultes estoient contraints de confesser leur pauureté, lors qu'ils voyoient le grand recueil que j'auois fait des liures de leur profession, dans cette riche Bibliotheque: & que les plus grands amas de volumes en Medecine, n'estoient rien au prix de ce que j'auois assemblé en certe Faculté: Que la Philosophiey estoit plus belle, & plus florissante, qu'elle n'a iamais esté en Grece: que les Italiens, Alle-

mans, Espagnols, Anglois, Polonois, Flamans, & autres Nations y trouuoient leur Histoire beaucoup plus riche & mieux fournie, qu'ils ne faisoient chez eux-mesmes; que les Catholiques & Protestans pouuoient y verifier toutes sortes de passages, & y accorder toutes sortes de difficultez: & pour donner le comble à toutes ces perfections, pour les rehausser & les mettre en leur vray lustre, n'est ce pas assez, M<sup>rs</sup>, de vous produire pour des preuues assurees que son Emin. en vouloit faire vn present au public, & la donner au soulagement commun de tant de pauures Escoliers, Religieux, estrangers, & de tant de personnes doctes & curieuses, qui deuoient y trouuer tout ce qui leur estoit necessaire: N'est-ce pas dis ie assez, M<sup>rs</sup>, de vous produire & presenter icy l'Inscription que l'on deuoit mettre sur la porte de la Bibliotheque, pour inuiter le monde à y entrer avec toute sorte de liberté, & qui y auroit esté attachée il y a plus de trois ans, si les guerres & dissensions domestiques n'eussent point dauantage preiudicié aux bonnes intentions de son Eminence, que n'auoient fait les estrangeres.

LVDOVICO XIV. feliciter imperante, ANNA AVSTRIACA  
Gastrorum Matre Augustissima regnum sapienter moderante, IVLIVS  
S. R. E. CARDINALIS MAZARINVS: utriusque Consiliorum  
Minister acceptissimus, Bibliothecam hanc omnium linguarum, artium,  
scientiarum libris instructissimam, urbis splendori, Galliarum ornamento,  
disciplinarum incremento, lubens volens D. D. D. publicè patere voluit,  
censu perpetuo dotauit, posteritati commendauit. M. DC. XLVIII.

Voila M<sup>rs</sup>, vne Inscription qui se peut dire ancienne, puis qu'il y a si long temps que l'on en parle, & qu'il n'y a lieu en l'Europe où elle ne soit conneuë; & quoy qu'elle die & comprenne beaucoup de choses, ie puis neantmoins vous assurer que son Emin. en meditoit encore vne autre beaucoup plus precise & plus considerable, puis qu'elle deuoit establir & faire valoir ce genereux dessein de fonder vne Bibliotheque publique au milieu de la France, sous la direction & protection des premiers Presidens des trois Cours Souueraines de cette ville, & de Monsieur le Procureur General; se persuadant que par vn moyen si puissant & si venerable, la posterité iouyroit sans fin d'vn depost si aduantageux, & qui pouoit sans preiudicier à ces fameuses Bibliotheques de Rome, de Milan & d'Oxford, passer non seulement pour le plus bel amas de liures qui ait esté fait iusques à present, mais encore pour la huitième merueille de l'Vniuers. Et cela estant ainsi, comme en effet ie suis prest de iurer sur les saintes

4

Euangiles, que l'intention de son Emin. a tousiours esté telle pouuez vous permettre, Mr<sup>s</sup>, que le public demeure priué d'une chose si vtile & precieuse? pouuez vous endurer que cette belle fleur qui répand desia son odeur par tout le monde, se flétrisse entre vos mains? mais pouuez vous souffrir sans regret qu'une piece si innocente, & qui ne perira iamais que tout le monde n'en porte le deuil, reçoive l'Arrest de sa condamnation par ceux-là mesme qui estoient destinez pour l'honorer & pour la favoriser de leur protection. Pensez, M<sup>rs</sup>, que cette perte estant faite, il n'y aura iamais homme au monde, lequel à moins d'auoir autant d'autorité dans le Ministère, & autant de zele pour les bonnes lettres, qu'en a eu M<sup>r</sup> le Cardinal Mazarin, la puisse reparer. Croyez, s'il vous plaist, que la ruine de cette Bibliothèque sera bien plus soigneusement marquée dans toutes les Histories & Calendriers, que n'a iamais esté la prise & le sac de Constantinople. Et si mes labeurs de dix ans à construire vn tel ouurage, si tant de voyages que j'ay faits pour en ramasser les materiaux, si les grands soins que j'ay pris à la disposer, si le zele ardent que j'ay eu à la conseruer iusqu'à cette heure, ne sont pas des moyens suffisans pour me faire esperer quelque grace de vos bontez singulieres, en ce temps principalement où vous auez encore plus de suiet de les exercer sur cette Bibliothèque, que vous n'auiez il y a trois ans, lors que par vn Arrest solennel vous iugeastes à propos de la conseruer, & de m'en donner la garde; permettez au moins M<sup>s</sup>, que j'aye recours aux Muses, puis qu'elles sont si interessées en la conseruation de ce nouveau Parnasse, & que ioignant le credit qu'elles ont enuers vous à mes tres-humbles prieres, ie vous puisse dire comme fit l'Empereur Auguste, lors qu'il estoit question de perdre ou de sauuer l'Eneide de Virgile, laquelle toutefois ne nous auroit pas esté plus inimitable, que le fera cette Bibliothèque à la posterité.

*Soluetur litera diues?*

*Et poterunt spectare oculi, nec parcere honori  
 Flamma suo, dignumque operi seruare decorum.  
 Noster Apollo veia, Musæ prohibete Latina.  
 Sed legum est seruanda fides, suprema voluntas  
 Quod mandat, fierique iubet, parere necesse est.  
 Frangatur potius legum veneranda potestas,  
 Quàm tot congestos noctisque, diisque labores,  
 Hauserit vna dies, supremæque iussa Senatus.*



G. N. P.

